

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

MIŠLJENJE

**Po zahtjevu KJKP Gradski saobraćaj d.o.o. Sarajevo o obavezi postupanja po
Rješenju Konkurencijskog vijeća broj: 01-01-26-172/05 od 27.12.2005. godine**

**Sarajevo
oktobar, 2010. godine**



Broj: 01-01-26-629-1-I/10
Sarajevo, 27.10. 2010. godine

Na osnovu člana 25. stav (1) tačka f) Zakona o konkurenciji ("Službeni glasnik BiH" 48/05, 76/07 i 80/09), a po Zahtjevu Kantonalnog javnog komunalnog preduzeća Gradski saobraćaj d.o.o. Sarajevo, Velikih drveta 1, 71000 Sarajevo, Bosna i Hercegovina, zaprimljenog od strane Konkurencijskog vijeća dana 22.7.2010. godine, pod brojem 01-01-26-629-I/10, Konkurencijsko vijeće, na 3. (trećoj) sjednici održanoj dana 27.10. 2010. godine, je donijelo

MIŠLJENJE

Kantonalno javno komunalno preduzeće Gradski saobraćaj d.o.o. Sarajevo, Velikih drveta 1, 71000 Sarajevo, Bosna i Hercegovina (u daljem tekstu: Podnosilac zahtjeva ili GRAS), podnio je Konkurencijskom vijeću Zahtjev za davanje mišljenja (u daljem tekstu: Zahtjev), zaprimljen dana 22.07.2010. godine pod brojem 01-01-26-629-I/10, o obavezi postupanja po rješenju Konkurencijskog vijeća broj:01-01-26-172/05 od 27.12.2005. godine.

Podnosilac zahtjeva traži mišljenje Konkurencijskog vijeća, da li je Ministarstvo saobraćaja Kantona Sarajevo trebalo postupiti po navedenom rješenju Konkurencijskog vijeća i u slučaju izdatih rješenja za redove vožnje na linijama: Sarajevo-Ilijaš, Sarajevo-Kamenica, Sarajevo-Raštica, Ilijaš-Kamenica (Crna rijeka), Srednje-Kamenica (Crna rijeka), Srednje-Sokolina, Ilijaš-Srednje, Ilijaš-Popovići, Ilijaš-Bioća, Ilijaš-Misoća, Sarajevo-Tarčin-Raštica i Srednje-Dragoradi, koje su dodijeljene prevozniku «Centrotrans-Eurolines» d.o.o. Sarajevo, na kojima je bilo izmjena u redovima vožnje nakon 2002. godine, bez javnog oglašavanja.

Naime, Konkurencijsko vijeće je dana 27.12.2005. godine donijelo Rješenje broj: 01-01-26-172/05 kojim je utvrđeno da Ministarstvo saobraćaja Kantona Sarajevo, kao organ državne uprave koji svojim djelovanjem direktno ili indirektno učestvuje ili djeluje na tržištu, u smislu člana 2. Zakona o konkurenciji, počev od 2002. godine pa nadalje, sprječava, ograničava ili narušava tržišnu konkurenciju na relevantnom tržištu usluga javnog prevoza osoba i stvari u javnom gradskom saobraćaju na području Kantona Sarajevo, iz razloga nedonošenja obaveznih propisa i nepostupanja po zakonu, čime se stvara administrativna i pravna prepreka pristupu utvrđenom relevantnom tržištu, drugim privrednim subjektima-prevoznicima u Kantonu Sarajevo.

Tačkom II (2) Rješenja naloženo je Ministarstvu saobraćaja da u roku od 6 (šest) mjeseci donese propis iz člana 8. Zakona o prevozu u unutrašnjem drumskom saobraćaju i pokrene postupak javnog usklađivanja redova vožnje na području Kantona Sarajevo, u skladu sa propisanim postupkom u Pravilniku o kriterijumima, postupku i načinu usklađivanja i registracije redova vožnje.

Tačkom II (3) Rješenja naloženo je Ministarstvu saobraćaja da u roku od 6 (šest) mjeseci dostavi na uvid usvojeni propis iz člana 8. Zakona o prevozu u unutrašnjem drumskom saobraćaju i Odluku o usklađivanju redova vožnje za linijski prevoz osoba donesenu u skladu sa Pravilnikom o kriterijumima, postupku i načinu usklađivanja i registracije redova vožnje, kao dokaz o izvršenju naloga iz tačke 2. ovog rješenja.

Shodno tome, Ministarstvo saobraćaja Kantona Sarajevo je bilo dužno postupiti po Rješenju Konkurencijskog vijeća, odnosno bilo je dužno donijeti poseban propis koji će urediti uslove, način i organizaciju obavljanja javnog prevoza osoba i stvari na području Kantona Sarajevo, kao i pokrenuti postupak javnog usklađivanja redova vožnje na području Kantona Sarajevo u skladu sa propisanim postupkom u Pravilniku o kriterijumima, postupku i načinu usklađivanja i registracije redova vožnje.

Konkurencijsko vijeće očekuje da će Ministarstvo saobraćaja Kantona Sarajevo preduzeti sve potrebne radnje na izvršenju Rješenja u cjelosti, radi čega će i dalje pratiti njegovo izvršenje i preduzimati odgovarajuće postupke, u skladu sa Zakonom.

Ovo mišljenje je dato isključivo na osnovu podataka navedenih u Zahtjevu, te ukoliko dati podaci odstupaju od stvarnog i činjeničnog stanja ovo mišljenje se ne može primijeniti.

**Predsjednik
dr. Stjepo Pranjić**